

牧

齋

初

學

集

牧齋初學集卷第四

歸田詩集下

起天啓七年
丁卯盡一年

丁卯元日

一樽歲酒拜庭除
稚子牽衣慰屏居
奉母猶欣餐有肉
占年更喜夢維魚
釣簾欲迓新巢燕
滌硯還疏舊著書
旋了比鄰雞黍局
竝無塵事到吾廬

再用前韻

流年已過似蠲除
歲酒江南正索居
靜聽兒童喧竹馬
閒看几榻走衣魚
迎來富貴占新夢
鞭

得聰明讀舊書

迎富貴鞭聰明皆正旦
童稚俗法見元微之詩笑殺吳

儂成底事頽然一醉偃蓬廬

書破山刻石屋珙禪師語錄後

石屋虞山產初機逗天目西峯扣擊久風亭悟
因熟透網橫金鱗法海吞鮪鮓靈骨歸海外微
言著遺錄此事非等閒妙悟絕軌躅單傳歷千
載鑿鼓號塗毒神劒光差差飛矢鋒鏃鏃性命
若絲懸誰與敢輕觸嗟吁數年來法門倒竿盡
游蜂各稱王蚍蜉羣聚族紛紛召聾瞽往往汙
簡牘愚人苦煮沙智者哂災木頑磚不成鏡焦

芽難種穀哀哉犬與驢豈堪龍象蹴山僧刻此
編貽我寒齋讀一讀再三嘆喟然感流俗淤泥
生妙蓮炎火見真王誰續傳燈傳一洗肉眼肉
上元夜點燈與家人小飲

小欄曲幙自周遮燕賞依然盡室譁羅袖叅差
迎畫燭玉釵旋折避銀花燈如宿鳥枝相亞人
似遊魚影互加聞道六街俱寂寞憑將一笑挽
年華

十六日雨中邀徐于諸人看燈口占代簡
曲欄陰靄意萋迷發興邀賓走尺蹏已剩宿雲

遮繡幙更添微雨作香泥花間沾濕春衣好屋裏迴旋舞袖低著屐賞燈君莫笑風光正在小樓西

次韻徐大子王別後有憶之作

月午花深底樣愁更堪淚眼送歸舟他年結子空悲柱前度看花尚憶劉人可意時無那死物牽情處信知尤柳絲不斷西陵夢掛紙知君到秀州

蘇小小墓在秀州徐凝詩只有縣前蘇小小墓亦在秀州無人送與紙錢財徐有故伎歲上其墓

州道中

別後有憶賦七字句請牧翁同作

徐于

觸忤閒腸舊置愁
追憐夜壑早亡舟
情牽嫩柳曾傷李
選唱新詞絕似劉
投老餘痴堪自笑
爲花添瘦任人尤
惟憑月落孤衾夢
覓遍虛無更九州

再和徐于前韻

萬斛風帆不載愁
多情一別類沉舟
生憎燕子辭王謝
錯怨桃花賺阮劉
人爲風懷偏易老
天因離恨也多尤
君看東海還清淺
或有神芝出祖州

柳絮詞爲徐子作六首

唱斷蘇臺楊柳枝
春愁如線又如絲
古歌舊恨君休記
聽取新翻柳絮辭

其二

送郎莫唱楊柳枝
生憎一簇更千絲
柳枝只解綰離別
柳絮隨郎無盡期

其三

白於花色軟於綿
不是東風不放顛
郎似春泥儂似絮
任他吹著也相連

其四

亂點新粧拂畫眉玉樓春盡倚欄時隨風乍可
沾泥死莫作浮萍逐水移

其五

高下縈迴度好春悠揚如夢又如塵風流性格
依然在爭似長條解絆人

其六

柳絮新歌續柳枝情塵如浪淚如絲沈園柳老
綿吹盡夢斷香銷向阿誰

次韻徐于傷故伎詞二首

桂華落盡影鬢斂日夕牛羊上壠多記得當年

歌此曲引聲不忍到嫦娥

桂華徐故伎名也白樂天有桂華曲

其二

豔質嬌歌宿草前
清明拜掃已多年
秋風舞盡雙蝴蝶
還是春來送紙錢

澤州王述文侍御罷官里居
詒余書曰杜門無事灌畦教子公爲我賦詩以發雀羅蝶夢之意
遂屬善畫者爲二圖以寄各系五言十韻書于卷尾

雀羅

落薄休官日蕭條却埽初
高軒多去跡連騎少

來車鶴蓋陰方散龍門阪遂虛陸潘槐柳在趙
李履綦疎賓客何勞謝蓬蒿不用鋤無媒荒徑
路有雀下堦除剝啄兒童喜嬉遊伴侶如張羅
還寂寂避網亦徐徐彈射珠堪惜飛鳴粒願餘
物情君自見莫學署門書

蝶夢

愕夢前塵外浮生一枕餘蛇鈎身入定蟬蛻息
還虛寐熟眠龍穩神閒化蝶舒良宵看栩栩清
晝想遽遽牽惹游絲竝懽騰戲慢如花明鳬蕩
漾日煖影于徐颺去茶煙緩驚迴杆響疎鶯梢

酣暘後燕語欠伸初莫辨蕉隍訟何因鼠穴車
與君聊作伴昔昔願爲魚

寄澤州張吏部

光前

四十韻方聞屯留暴

給諫之計詩未悼之兼懷張藐姑甘州

前年入都門逢君戒徒御班馬鳴路岐斜日寺
門暮衝風起御溝落葉滿行路滄海忽颺塵市
朝了非故君既自免歸余亦見抵去小人無遠
慮戢身守沮洳襪襪卽田功岑筓省省魚具公上
給耕桑伏臘俟牧酤屏跡徒牆面端居類穴處
痴癡鑽紙蠅兀兀蛀書蠹剝剝刑或免甕額疾

已瘡吾衰何足云終焉其殆庶聞君方樂志築
室理園圃王屋面軒窗天井負楹柱丹林被翳
蒼沁水逕迴互林巒却復迎煙靄漬還聚花藥
春榮繁燕麥冬暄布潛藏養氣志蕩滌放情懷
明月見嘯歌清風起毫素鳴鶴哀居貞漸鴻貴
儀羽三晉饒雲山中條鬱西顧秀發著眉宇屈
盤儼負護風隄絳守池覽炤王官墓參井畜氣
潤靈境神所居被褐矜懷抱登朝好修嫿掩抑
避謠詠局促事翁嫗一朝謝羈紲懼夢喜得寤
游觀極俯仰天其爲君助人生皆旅人勞勞苦

寄寓功名如輕塵富貴比危露嗟我暴公子
匿車出通洛淖約藐姑人荷戈酒泉戍膏火自煎
熬駟馬帶傾仆不見黑頭公策免美徒步修門
杳何期靈環邈難訴脫髮寧戀梳截足肯適屨
有酒且當歌方時莫量雨盛壯欣樂康晚晚足
暇豫看君鷗鵬遊笑我尺鷃舉長謠匪遂歌聊
以代晤語

苦雨嘆

東南天漏何時好一月愁霖失晴昊卑濕嘗看
墻壁昏繁翳不辯窻櫺曉羲和望舒停轡御商

羊黑蜥肆鱗爪簷溜鏗訇如撞胃點滴搗瑋欲
貫腦蛟蛇蹙撈爭平陸蛙黽跳梁上木杪未須
沮洳愁九穀且自哀爛悲百草今年獻歲已發
春雨雪稍遲震電早玉女忽隨滕六笑雪師兼
把雷車掉陰陽攢簇并一時天公號令肯顛倒
占年誰與問乙巳唐誌李淳風撰乙巳占起算上元乙巳紀事將
無類乙卯唐布衣李潛用撰乙卯紀事將
有好恒雨恒暘責非小老農嘈嘈亦何爲歸來
蒸薪避行潦

寒食後雨不止書示鄰里

甲子冥冥雨浹旬愁霖高揖轉傷神今年寒食
真無火何處煙花別有春呼婦鳩還勤過我竊
脂雀亦窘如人自慙及物非吾事早餉鄰翁有
東薪

其二

從星不辯畢箕文行雨誰將點滴分近靄渾疑
平作地遠山直恐化爲雲江鄉蝦蟹還遺種海
國蛇龍敢亂羣擬上天公牋一紙老農可許綠
章聞

畫士張季挽詞

一棺寂寂掩柴菅零落貧交清酒還俠骨千年
埋傲兀孤墳三尺起孱顏松頭月炤新封土花
裏鶯啼舊隱山粉繪不隨長夜盡數峯依約暮
雲閒

贈陸墓邵叟是僧彌之父

蓬蒿三徑少追扳中有高人善閉關忙爲市南
行藥去閒從城北討春還齋時婦料供僧米晝
裏兒皴過雨山寄語道旁名利客青門原只在
人間

金壇于潤甫釀五加皮酒爲南酒之冠潤

甫與繆仲醇友善仲醇善別酒釀法蓋得之仲醇今年潤甫釀成損餉而仲醇亡矣賦四十二韻奉謝并悼仲醇

我飲不五合頗知酒中味苦愛此酒佳芳香入夢寐頻年再出山衰遲受顛躓不獨戀官爵兼亦爲酒累自從歸田來道遠苦莫致吳酒負虛名往往煩餉饋糟與啜醅委頓非吾志惡酒如惡客其性悍而驚撐腸芒角起薄喉爐炭熾甜酒如小人其性柔且遲口吻滋嚼嚙關高長脂膩我性與之違何能強周比入盞先皺眉沾

唇已蜚鼻方當困幽憂况復苦陰曠無帚孰埽
愁有鈎不除睡朝來送酒人遠自金壇至未暇
潔尊壘先呼擊泥埴黃柑洞庭春雲露石湖貴
猶嫌金醴薄不美松花細肅如見君子寒清沁
心肺藹如近美人光風汜腸胃雲陰解翳駁鶯
花見明媚暄如踏春陽冷如坐月地頭風愈眩
運未疾起重腿螟蛉息嘲啁雷霆斷驚悸丁寧
戒室人此物吾所嗜升合謹斟酌朝夕手封閉
頻頻看甕面促數滌飲器不畏大戶嗤但恐後
車匱中年多哀樂昔遊盡顙頤我友繆仲醇別

酒號渠帥生平家人產強半營酒事勁正本式
法清濁剖涇渭酒家有南董此翁庶無愧一朝
歸黃壤酒鎗閉空筭盈尊不能飲墳土空復漬
感君餉我酒知君有深意安用聖人爲飲此盡
日醉我醉亦易醒君酒難再乞流涎忍口饒信
筆作詩戲美彼公孫朝封麴成委積從君賃酒
城願爲此中隸

金壇酒垂盡而孟陽方至小飲作

佳醞那能不共持開尊欲酌便相思曹公自解
沉吟意陶令偏憐顧影時杯盡政如春去急壺

傾可柰客來遲一觴莫笑頻相勸無酒明朝更
慙誰

顧炳秀才遺書索飲有醉吐丞相車茵之
語作七字句報之

糟丘且莫歎沉淪漢世君看尚酒人已見相公
呼後舍更聞馭吏歐車茵無多酌我終須醉時
一中之頗近真却笑楊雄老投閣鴟夷瓶井向
誰論

與顧秀才飲酒作

無花頗恨司

去

花神有酒偏宜衝酒人但看當

筵浮大白何愁後閭走窮賓桑閒布穀催耕急
樹上提壺勸飲頻我老君貧何所作商量同占
醉鄉民

以頂骨飲器勸酒次秀才韻

風雨闌珊春暮時銜盃莫問夜何其酒旗已分
臨天駟飲器休辭倒月氏新廟還應祀儀狄後
車定合置鴟夷中山醉死真堪羨千日無勞問
醒期

短歌答博羅韓孟郁博士

昔年留君醉燕市東方兵起君歸里今年君官

南橋門我已久褫頭上巾人生相知苦難見何
異秋鴻與社燕感君寄我長句詩懷袖殷勤置
君扇東華茫茫舊塵土我已無夢君何詡花磚
日午啼邛雞鈴索蕭閒睡鸚鵡與君俱已鬢如
絲可憶青山有宿期廣文雖冷官猶在吳市相
尋定幾時

孟郊丁未落第和余詩云
異時倘相尋或在吳門市

文三啓美次余除夕元旦詩韻見寄疊韻
奉荅兼簡文起狀元

奇石名花錯盞盆清言竟日寡寒溫停雲家世
紅欄里邀笛風流白下門芳草閒庭新度曲桐

華小院別開尊廿年游跡如前夢每向空齋屈指論

其二

信美芝蘭接砌除依然布褐共閒居霧深欲隱南山豹風積能搏北溟魚陸氏有文嘗互評謝家無夢不堪書對床風雨聽蕭瑟珍重衡山舊草廬

代鶴答

軒墀會是誤恩來野性終期碧海隈承日自憐丹頂在梳風未忍素翎摧長鳴半夜知誰和靜

立閑庭恥受媒惆悵王京稀伴侶爲君三疊舞
琴臺

贈竹深堂鶴 徐于

野鶴婆娑舞竹深疎簾隱几對蕭森長鳴自
吸三危露獨立孤舍萬里心未許軒墀分氣
色漫隨魚鳥看升沉可因彈射年來甚祇是
幽棲合在林

和徐于悼響閣前小松之作

新松無復倚疎籬想見亭亭偃蓋姿風過尚傳
清楚語鶴歸還認舊栖枝識符十八終爲夢壽

到千齡亦有期猶勝不材樗與櫟空令匠石笑
支離

其二

提壺自挂石欄前每爲庭柯一悵然可是孤根
難蟄地也應造物忌叅天未成鱗甲先供伐稍
出蓬蒿已被鐫回挽滄江更誰是直須雲壑臥
千年

孟陽載酒就余同飲余方矢子疊前韻志
感

別後春醪憶共持多君載取慰相思豈知河朔

閑尊日正是延陵喪子時
醉死却輸劉白早憂來
還恨杜康遲淋漓戲墨
燈前事浣壁書窻更泥誰

三疊韻荅孟陽慰余哭子作

中酒心情不自持如魔似病攪人思
惜騰殘夢花飛候寂寞空梁燕去時
老覺繁霜侵鬢早愁看明月入懷遲
憑君一笑聊相共開口來朝更向誰

亡兒後拆所築月臺悵然有作

月臺平築子城隈一日嬌兒上幾回
思子不堪

頻悵望傷心無復倚崔嵬欄傾似逐風鳶去檻
拆誰牽竹馬來又恐他年雛鶴返不知城郭認
樓臺

登茅山三首

便闕虛臺已字文仙山終古屬三君秦王自改
人閒鵬梁代空餘嶺上雲芝月有光期獨采松
風無價許平分積金連石遺封在笑殺紛紛蟻
子羣

其二

一入華陽隔世氛天壇真擬見茅君溪田黯黯

流殘月樓觀葱籠駐曉雲谷口樵歸纔出日洞
中碁罷又斜曛白頭未了人間事慚愧曾探七
詰文

其三

飈輪迹在大茅東逋客依然識舊宮近岫過雲
如設色遙山湧浪欲排空暮蟬乍歇千林雨秋
笛先催一葉風回首南朝塵霧裏徒聞宰相在
山中

六月二十三日元符萬寧宮爲亡兒設醮
星月空寥便闕開拜章親上步罡臺誰知玉斧

尋真去却要非熊戀世回天上噉書傳不易

真誥

云許氏遺經皆傳王莽之子黃民

塵中小兆夢還來仙山亦有

呼兒鳥莫道人閒盡可哀

顧況大茅嶺東憶亡子詩云谷鳥猶呼兒

山人夕露襟況之子非熊也見段氏酉陽雜俎

茅山懷古六首

磐石崇天壇勾金隱地肺叔申既來遊二弟亦
至止山中輕宰相人閒重長史君看神武門掛
冠復誰子

其二

新莽竊漢籙偏走媚百神刻鏤金玉鐘齋贈三

茅君斗柄難久據
蠅聲徒穢聞
三君笑不顧騎

鶴凌白雲

逆奄遣使祈福方內名山首及三茅

其三

夏馥謝漢辟徵書著桑樹
及其遇鈞黨變形老
傭雇仙籍隸方諸
史傳書黨錮寄語人閒子
蹙蹙何所慕

夏馥爲保命府明晨侍郎保命府華陽五府之一也見真誥稽神樞

其四

隱居度世人
豈昧救世局
惜哉齊梁主
難繫白駒足
高名託外兵
微言著別錄
英英嶺上雲
至今在空谷

其五

峩峩積金峯帶以連石鄉隱居割封邑弟子授
寵章蠻國遞相雄蟻封安可嘗煌煌十賚文千
年勒華陽

逆奄之子進爵
寧國將議封建

其六

紹述亂綱紀鼎物象播遷仙都白玉印乃在華
陽巔銅人已辭漢石鼓終入燕至寶歸上清長
得保天年

謝于昭遠寄廟後茶次東坡和錢安道韻
昔人苦作有情癡下飲不知茶與茗我今懵懂

百不解獨有啜茶能記省感君寄惠手自煎洗
杓停匙坐傾聽活火新泉沸石銚潑觸乳花發
香性森然茶星知有無但覺芒寒與色正睡魔
迸散暑氣退松風蕭颼白日永搜腸潤吻如有
靈破悶祛煩不須猛此茶先春出顧渚宛如金
苗引石礦山崖高寒初日溫受氣中和離炎冷
輕身療病比服食醫國豈必用骨鯁我生愛茶
復愛仙近日初來積金嶺世事突兀看槍旗富
貴紛紛詫團餅長腰米飽午夢足捫腹但餘光
炯炯行買山田入陽羨更置水逶迤石井東坡

老人太苦硬刺刺品茶刺貴倖我詩漫浪聊戲耳只愁湍泉飲生癭

丁卯孟秋聞時享太廟作

清露晨流肅羽旄上公升拜采雲高殊勲久冠貂蟬列聖主初辭裸獻勞九廟神靈還陟降千官趣走奏倍著蒿遺民舊日叨陪祀親見曾孫奠黍蕭

八月十四夜艤舟虎丘與孟陽長蘅小飲小舟如簾閣艤向虎丘涖笙歌何喧闐餘音沸煙水孤吟發蚓竅閔默復隱几譬如坐禪僧飄

瞥心數起，茫然空谷。音忽見，程與李殷勤如明月。入我船，窻裏小酌，無盤餐，開顏且歡喜。四山歌吹罷，落月汎清泚。貧老羞見月。子猷詩句斯言未爲旨。月如今，我羞不及故人矣。歸舟對孤枕，懽懽心未已。延緣葦閒音，猶恐是二子。

八月十五夜

歸舟信孤颿，忍與明月別。今夜生公石，駢闐那可說。酒氣昏深池，人煙冒清樾。喧喧鼓吹罷，清歌如一髮。歸人盡扶醉，坐客但耳熱。有曲誰解賞，歌者自悽咽。我生好清游，避此繁麗窟。歸來

呼病婦舉杯共邀月忽聞小樓西高歌唱圓闕
去去勿復聽使我心斷絕

八月十七夜

今年十七夜圓月勝三五月滿不厭遲弦望自
有敘譬如繁艷花春殘始開吐又如妖冶人半
老鬪眉憊我爲驗曆頭欣然命儔侶新萸絮尊
罍小摘倒筐筥酒伴期不來茫然似失伍長鬚
兩三人嘆息自相語北里考歌鍾黃金充棟宇
東鄰喧鼓吹錢刀壓倉庾主人有何樂懵騰自
豪舉病婦支空床嬌兒臥淺土文籍滿四壁饑

來不堪煮流光炤素髮吟蟲響空杼任彼明月
好豈能變愁緒僮言良可聽我興未能阻捫胃
自跳踣擊撞類曰杵天公爲解圍晴昊變風雨
依韻荅徐于病中見懷

簾閣香殘正憶君新詩宛轉似迴文每憐面會
如千里未省腰圍到幾分合眼閑來推昨夢支
頤懶去看秋雲多情多病真相似搔首何辭到
日曛

彭幼朔仙翁丙寅十月化去歲盡却有手
書貽所知多言化後事蓋尸解也幼朔嘗

登高寄余詩云謾嗟魚服英雄老爛醉龍
山感慨多蓋亦功名自喜之士晚而入道
者昔人言英雄回首卽神仙此語蓋不誣
丁卯九日獨坐感嘆因續成其詩以傳于
好事者

桃實偷嘗已再過榴皮書字半銷磨尚嗟魚服

英雄老無那龍山感慨多梁父舊游還跨鹿

幼

云有道人見徐元直跨青城老將去乘騾

姚平仲事

見陸務觀知君不少登高伴却望人閒一醉歌

渭南集九日得徐于詩却寄

今辰掩戶復停觴總爲登高易斷腸四海知予
惟兩鬢三年與爾共重陽黃花笑客應無數白
鴈愁人又一行同病更憐同賞在解捐萸酒助
茶香

皎然九日與陸羽賞茶詩云
俗人泛萸酒誰解助茶香

重陽次日徐二爾從饋餽蟹

肴具圓方雜醯熬白衣今日送衡茅旨甘重識
加餐意選擇遙憐纖手勞自笑吾家傳嗜蟹敢
言詩句補題餽小人屬厭君休誚一飽如今學
老饕

天啓七年九月九日聞 大行皇帝遺詔

二首

風悲霜慘集，茲辰旅鴈南來報計真。萬國心傷
馮几詔，三年腸斷屬車塵。身爲馬角生來客，夢
作龍胡墜下人。欲臨國哀何處所，市南扶杖問
遺民。東坡聞元祐太后升遐，吏以罪人不許成
服，余雖除名，猶爲平人，遂從耆老後哭臨
者，亡于禮也。

其二

豐芑深懷，皇祖仁艱危誓欲副貽孫。兩年書
命塵東閣。天啓元二
承之內制三月官銜忝北門。乙丑春
兼學士
至五月而罷一出承明占國論，得歸茅屋賴君恩。

殺身自此知無地泣盡三聲向嶺猿

九月二十六日恭聞登極恩詔有述

三載先朝版藉民詔恩重許從儒紳沐猴

自笑冠非我廐馬應慙顙似人

柳子厚起廢答有病顙之馬

革解帶圍多漫漶蟬辭衣篋尚逡巡影娥川水清如許偏炤東歸舊角巾

其二

衰殘不稱掛金章且作斑斕拜北堂旋取朝衣來典庫還如舞袖去登場聊將野鶴爲雞伴寧許沙鷗入鷺行只合鄉人推祭酒蒸豚簫鼓賽

畊桑

徐大于王聞 詔枉詩見賀奉荅二首

彈冠何敢附清流擊壤欣爲野老儔屈指浮名
真泛泛驚心靈夢尚悠悠朝家求舊存芻狗人
世更新學土牛見說臯夔滿臺閣祇應留我作
巢由

其二

安穩磯頭舊釣緝 主恩深處是沉淪敢言身

退如迂叟却喜人呼作老民

陸務觀自署
山陰老民

襍

久裁春後服畫圖時塾雨中中騎驢倒墮君休

笑聖世今真作幸人

丁卯十月書事四首

道塗好語沸兒童扶杖謹呼我亦同斗柄已聞
歸聖主冰山何事倚羣公阿璫總曳尚書履
頌厥還乘御史驄勇退史應書阿母拜章先出
掖庭中

事竝見天啓七年邸報

其二

絲綸閣下競津塗楊李

新都茶陵

諸公不可呼夏屋

棟應書梓匠明堂稅亦畫侏儒羹調衆口須兼
味船急中流仗一壺共道微垣新氣象天樞旁

看四星無

於時果有四相

其三

秋窻晴日影遲遲
午夢初醒忝罷炊
獨對空枰嘗歛手
每臨殘局更談碁
霜清狡兔爭營窟
月白驚烏盡揀枝
一著雖低差較穩
且依旁角守茅茨

其四

黃門北寺獄頻仍
錄牒刊章取次徵
死後故應來大鳥
生時豈合點青蠅
蒼茫野哭憂邦國
寂寞家居念友朋
痛定不堪重拭淚
清齋勤禮佛

前燈

羣狐行

一狐縊死鎖琅璫一狐縊死懸屋梁羣狐作孽
兩狐當公然擲榆立道旁昔日羣狐假狐勢一
狐爲宰一狐帝一朝狐敗羣狐跳殺狐烹狐卽
爾曹兩狐就縊皆號咷狐不生狐乃生梟狐已
死梟尚肆捕梟作羹亦容易羣狐羣狐莫嬉戲
夜半睽忽雷火至

舟師歎

千舟百舟若鱗次大艚小艚如櫓比舟師夢寐

呼水至愕起依然閣平地黃旗夙昔凌長風布
帆滿張百石弓攤錢白浪笑舉酒胡乃束手稱
技窮我坐船艙自悶默眼看寸進還退尺潮平
風正尚無期橫飛直下何繇得君不見午潮已
落暮潮催九日灘頭未是遲長年自辦乘風具
揆施開船會有時

牧齋初學集卷第四

牧齋初學集卷第五

崇禎詩集

一起崇禎元年
戊辰盡六月

崇禎元年元日立春

淑氣和風應候來
王春元朔併相催
故知青帝攢新令
不是天公厭兩回
東坡元日立春詩
省事天公厭兩回
受歲酒應羞白髮
向陽花欲笑寒灰
釣船游屐須排日
先踏西山萬樹梅

正月十四日與邵僧彌看梅西山繇橫塘
抵光福

放舟出橫塘喜與煙郭遠遠景宜日斜清游取

春淺嫩柳綠未舒寒條翠將展近水樹乍明遙
峯月漸顯同舟得佳侶靜好有餘善行看煙巒
紆坐愛溪橋轉約略雲樹間西山累甌甌山容
如高人作意任偃蹇我生在塵網鹿鹿苦未反
明朝山中雲倘笑歸來晚再拜萬樹梅爲我滌
顏覩

夜步虎山橋

信步尋谿橋卹犬吠林杪月色淡自佳山行誤
亦好暮峯歛餘黛早梅散輕縞定知今宵夢空
濛入幽討

元夕阻雨泊舟光福

尋花不覺遠直入梅花邨孤蓬坐滴瀝清曉如
黃昏未能理蠟展何暇開清尊名花初發時燕
賞亦遲人西山千萬樹亞枝趁朝暾洗粧映流
水薄寒倚柴門豈知墮煙雨掩抑空淚痕梅花
如靜女有恨初不言我懷同楚客莽莽欲斷魂
世無別花人此意誰與論

十六日冒雨游玄墓

發興上藍輿賈勇著芒屨尋花欲乞命韓詩都將命乞
花豈爲風雨怖冒雨發龜峯穿花到玄墓參月

橫清晨玉雪蔽行路沾濕聞雨香登頓入花霧
初疑雨妬花轉爲花惜雨梅亦愛清妍裏雨如
含露孤標宜輕寒靚粧倚薄暮秉燭如有思吮
毫未能訴欲償清游逋更覓寒餓句

奉慈庵紅梅一株嫣然獨出感而有作

萬樹漫山玉雪中一株獨自笑芳叢新粧不是
緣施赤薄怒應看近發紅聊貶高寒遮俗眼暫
化工

美人詒折梅一枝僧彌歎賞請余同賦

小院疏窻傍畫闌。攜來細向膽瓶看。端詳苦愛橫斜好，折贈深知揀擇難。伴我餘香宜夜靜，憐渠剪燭對更殘。一枝已識春風意，莫倚孤舟怨薄寒。

十七日早晴過熨斗柄登茶山歷西磧彈山抵銅坑還憇衆香庵

吳山環西南其山秀而嶧鬱盤起玄墓迤邐屬西磧梅花生其中居然好宮宅譬彼冰雪姿淖約處姑射回環具區水粘天浸寒碧空濛滋霜根浩渺蕩月魄湖山畜氣韻煙雲發芳澤所以

西山梅迥出凡梅格我來早春時發興蠟雙屐
探奇忘晴雨尋花越阡陌茫茫梅花海上有花
霧積不知何處香但見四山白藍輿度花杪登
頓旋已易恍忽如夢境愕眙眩游跡縱覽乘朝
暎留連坐日夕殘陽挂煙樹橫斜似初月清游
難省記勝情易追惜還恐梅花神芒芒笑逋客
衆香庵贈自休長老

略約緣溪一徑分千林香雪炤斜曛道人不作
尋花夢只道漫山是白雲

西山看梅歸舟卽事示僧彌

四首

廿年游跡半萋迷老去逢君又杖藜芳草路當
春雨後梅花村在衆山西茶山煙雨荒新築長蘅
欲結庵茶銅井莓苔沒舊題余與龔一淵孟何
山未果題名絕壁去今更憶盤螭桃萬樹人閒何限武
十二年矣陵溪盛今無復存

其二

千邨煙靄蔽芳叢流水疎籬有徑通花霧陰中
晴日變湖山斷處白雲烘低迷楊柳差新綠點
綴櫻桃記小紅安得松圓老居士墊中同過虎
橋東

其三

三年噩夢已塵沙，又向東君感物華。
獻歲雪消遲柳色，試燈風雨妬梅花。
會賒酒券書千卷，康以酒券從人儘放漁舟水一涯。
眼底仙源在，假太平御覽人世春深隨處有桑麻。

其四

虎山橋畔好溪山，聚塢銅坑取次扳。
屐齒衝將新雨去，杖頭携得老梅還。
青山對酒知誰在白髮，尋春讓我閑。
自此柴荆多晝閉，遲君花下或閑關。

虎丘秋月圖題贈似虞周翁

虎丘佳麗地中秋明月時吳儂競芳辰結伴相
遨嬉一翁迤邐來蒼顏白須眉徐行躡浮圖信
步穿劒池矍鑠憎扶掖矯健逾僮兒還憇千人
坐微汗揮裳衣游人羣指目伎女爭遶圍無乃
地行仙遨游下巖扉此翁少好游游興老不衰
年年中秋月艤舟虎丘湄排連五十秋晴雨莫
閒之譬如秋風鴈歲歲不失期還觀同游人游
跡苦叅差少者漸以老老者漸以稀山中有老
衲拱揖復嗟咨與翁爲輩行是我影堂師亦有

中年人髣髴漸成絲拍肩呼曾孫側坐相追隨
昔時裘馬客今或寒與饑畫船易新主簫鼓無
遺吹昔時紅粉伎零落歸山岬或爲衰年嫗乞
食行吹簫吳風遞更換吳粧日歲蕤短衣遍紅
紫大袖拂履綦吳歛稱絕調傾聽良已非新腔
難按拍急管增繁悲轉盼復誰是屈指亦自疑
豈獨市朝改兼恐陵谷移惟有生公石盤陀闌
成虧惟有劒池月秋來鑑如規羨此鶴髮翁身
閑步逶迤秋山與秋月年年對霜髭人生皆昔
夢一往不可追夢愕與夢歡夢者豈自知冶游

如好夢夢覺心說怡胡爲勞生人惘惘徒歔歔
翁今年九十健噉足若飛幸逢聖明世擊壤
歌雍熙煌煌老人星長炤虞山厓更度十中秋
爲舉百歲卮

悼鶴

來從何所化何之碧海茫茫不可追留魄尚疑
初月影招魂正在落梅時舞休竹裏風生少鳴
斷松閒露下遲約略重來還報我秋空春曉是
前期

其二

殘年百事苦傷悲更報胎禽去曉池院落又如
亡愛子寢門應比哭相知乘軒任爾誇新寵爭
樹還誰占舊枝商略雲山瘞仙骨玄黃祇恐未
相宜

瘞鶴銘云裏以玄黃之幣

瘞鶴之明日有鶴翔於鄉園去往年鶴來
之地一牛鳴耳宗老明翼氏購得贈余先
以佳咏感而致謝

獨鶴仍從海上來柴門還爲羽衣開丹丘信隔
猶凝望紫府書通便却迴顧影似憐曾舞雪返
魂應逐未殘梅仙家騏驎非凡骨寄謝詩人莫

漫猜

荅履之喜得鶴見遺四韻

雲消鶴去不勝愁小兆人間似可求

去年九月里人獻夢

有鶴去復來之詩

朱頂已蒙仙客號

宋李正文五客素詩號鶴爲仙客

翎還伴老人頭羽毛雖短誰能假菰米方殘豈

自謀莫向華亭論聲價相經久已誤浮丘

來詩云翔

集已知陽鳥意虞山聲價重華亭

依韻徐于喜見

月昏雲薄闇思量別緒參差有底長啼樹鳥闌
仍宛轉穿花蝶老故輕狂重支秋枕溫殘夢更

拂春眉理斷腸綰盡柳絲還柳絮東風只合爲

君忙

徐前後贈使有柳絲柳絮詞各數首

和履之花朝見示

惺夢纏綿尚記存芳華空對二分春淒涼寒食

還如我穠豔花朝乞與人生計料

平

量餘昔酒

功名磨折剩閒身白家大有穿楊手切莫蹉跎

學老民

用樂天喜敏中及第詩

題仙山樓閣圖

華堂遲日春融融嬌蘭寵蕙多光風誰爲此圖
掛素壁神山仙館來空濛參差崑崙頂縹緲扶

桑東上有摩天削成千仞之絕壁下有拔地偃
蹇百尺之喬松天光浮動日月水海濤激射颺
輪峯五雲聚族不成雨千霞解駁皆爲虹交梨
無根長翳薈夜芝有光炤丰茸琪花瑤草人不
識但見竹柏長青葱其間樓觀參差起璇瑰瑤
碧相蔽蒙細界煙巒辨棟宇平臨月駕開房櫳
墉城金臺盡治所易遷童初或離宮羣真續紛
互來往似謁金母朝木公金條脫玉玲瓏頂巾
作髻衣綃垂紅白珠約臂青章帶臂鳥爪紛指
掌虎齒還嬰童高堂壽母定誰是無乃亦在圖

畫中主人捧圖獻母側慈顏一笑回春容班白
稚齒齊上壽撞鐘伐鼓樂未終金盤擗麟莫數
他家事斟雉調鼎吾祖自有彭鏗翁楚詞天問
帝何饗神仙傳云彭祖
能調鼎進雉羹於堯

花朝魏仲雪徐于王諸人宴集賦詩用花
朝二字排韻余閉關不得與仲雪枉詩見
示依韻奉和兼簡于王

不分春光取次奢小闌側畔想芳華晴煙籠上
柳邛邛雨暖日熏桃樹樹霞舊社房櫳看到燕
新粧簾幙記回車憑君傳語東風道莫放花期

過棟花

其二

遨頭婪尾羨招邀
可惜關門負此宵
垂白心情餘我在
踏青風物任君描
春將好遍垂垂去
花旋開齊續續飄
準擬諸公作寒食
莫欺老子似今朝

春雨

小閣疎簾香篆遲
冥冥春曉似昏時
揩摩老眼看如霧
撥觸愁腸散作絲
淺綠樹滋鶯不覺
小紅花濕蝶還知
輕蓑麗屐垂楊畔
閒殺江頭老

釣師

春雪

記元年二月十九日事也多用東坡癸丑春分後雪詩句而反其意

遲日同雲更合圍東皇何事發陰機李梅冬實
原非分雪霰春深故作威繞樹鶯雛應罷語漫
天柳絮敢爭飛老農劇喜遺蝗盡旋覺陽和轉
褐衣

春雲

萬里春空碧落分微茫點綴起氤氲亭亭車蓋
誰吹汝漠漠高樓正憶君蔽日早時能待族飄
風一旦已離羣白衣蒼狗須臾事霖雨終期出

岳雲

春晴

暮霞新爛午陰收
儘放春光在陌頭
意愜好風吹綠醕
眼明初日照紅樓
青天宿霧看誰掃
白晝游絲颺不愁
爲報園林鶯鶯道
呼晴逐雨莫憑鳩

仲雪折梨花見贈口占

寒日到來春寂寂
梨花開遍月朧朧
煩君折贈銅瓶裏
閒殺庭前昨夜風
雪裏桃花次薛叟韻

雪花拂拂釀花朝故著桃花未肯飄傳白更憐
頰頰好欺紅不放粉墻燒朱門人面愁相映紫
陌塵埃恨欲銷擬爲寫生誰下筆王家還有雪
中蕉

雨中仲雪招飲海棠下

二月簾櫳中薄寒錦城花霧晝漫漫鮮妍正合
停杯賞沾濕何妨低帽看剪剪風輕還刻燭濛
濛雨重更憑闌知君卜夜留連意坐惜芳華未
許殘

寒食日于王仲雪諸人小集津逮軒

屐引奚奴杖掛錢隻雞近局許招延貧家節物
宜寒食病伎風光似禁煙茶白還爭分火候桃
紅欲褪賣餠天清平要著新詩寫好記崇禎第
一年

雨中海棠花下代徐于贈妓

風風雨雨妬花天人病花殘劇可憐還恐海棠
零落盡交梳窻下對花眠

寒食日看徐于別妓二首

落花細雨正佳晨萬樹紅芳一病身試看清明
寒食候料量還是未殘春

其二

梨花開盡橘花新
送妓憐君似送春
記取今年作寒食
粥香餠白爲何人

喜復官誥贈內戲效樂天作

三年偶失楚人弓
憂喜迴旋似塞翁
我褫緋衣緣底罪
君還紫誥有何功
佩環再試從風響
寶髻仍看耀日紅
重作安人莫侈太
饒耕還憶舊家風

白詩云我轉官階嘗自愧君加邑號有何功

聞新命未下再贈

山林裘褐可同羣
翟第雖榮且莫欣
昔褫帶顰

真爲我今遲官誥豈緣君譙樓風雪應知免應

母妻俱頌

內殿恩波更許分

元日

命婦朝中宮

懽懽

請看丞相婦綠窻朱卷對斜曛

傳聞

中宮好學新參夫人有

通鑑者

三月三日泛舟卽事十二韻

風光雨又晴上巳更清明節候今年異遨游此
日并煙嵐開水國雲錦蔽山城岸綠攀還折堤
青踏欲平執蘭修故事揅柳惜芳情新火紅粧
出香塵翠袖生就花拈舞蝶揀樹聽啼鶯泔泔
移舟緩盤回去馬爭歡娛窮日夕燕賞及時清

醉眼牽花影歸心殢鳥聲酒依金谷數詩儼麗
人行襖畢還相賀春衫試體輕

送張老還溧陽

張君攻岐黃高名走婦孺坦懷絕厓斤劇談見
情懷好酒復喜奕流連雜歌呼勝負如等閒局
終色不忤吾觀善奕者握子多顧慮推枰斂手
時黑白在何處古來當局人多爲一著誤縱負
國手名豈知拙工趣君來早鶯啼君去新蟬語
流光去不返屈指如傳遽與君須臾閒甲子在
旦暮安知世上人斧柯不已故餘尊湛東壁斜

日炤西樹且復竟一局酒闌送君去

牧齋初學集卷第五

牧齋集五

牧齋初學集卷第六

崇禎詩集二

起戊辰七月盡一年

戊辰七月應召赴闕車中言懷十首

三年嚴譴望修門隨例趨朝又北轅
聖代故應無棄物孤臣猶有未招魂
夕陽亭下人還過端禮門前石尚蹲
重向西風揮老淚餘生何以荅殊恩

其二

已辦腰鎌學耦耕悠悠真悔逐人行
長吟頗惜齊三士撫卷誰知魯二生
白馬清流傷往事南

箕北斗媿虛名巢繇至竟非無謂堅坐深山謝
聖明

其三

寥廓高天一冥鴻肯隨烏鳥問雌雄紛紛豈止
容卿輩碌碌何須笑乃公赤汗馬應空冀北白
頭豕自媿遼東郊原無限停車思落日披襟得
遠風

其四

傳呼何必厭乘騶風日清恬當出游坐穩依微
憑小閤睡酣搖曳在輕舟譬如禪坐還馳想只

作看山不下樓却數昔年行旅事分明殘夢已
悠悠

其五

淋鈴夜雨漏初長夢入江南櫻笋鄉重碧樹深
春燕語小紅花發臘醅香聞簫月下移歌舫度
曲風前近笛牀秋夢也如春夢短郵亭塵土正
茫茫

其六

露警秋衾夢亦清篝燈襖被駕車行征人倦睫
留殘睡客子枯腸帶宿醒日出棲鳥衝曙色風

回班馬亂秋聲前
邛旼喔真堪舞
不是荒雞午夜鳴

其七

客路無風沙自驚
飛鴻沒處暮雲平
山低落日坡陀影
岸瘠征車輾轆聲
村垓雨穿如土偶
林魈月薄竝人行
征塵滿眼君休笑
剩有清流可濯纓

其八

三年遷客意蹉跎
芳草天涯路又過
滕縣樹邊朝雨細
嶧山雲下夕陽多
心如乳燕初辭社
身

似飛蓬乍轉科苦憶淮南舊叢桂秋風爲我發
山阿

其九

信宿驅車每夜分鳥鳥聲樂感離羣秋聲獵獵
非關樹雨意濛濛欲作雲直北無風皆朔氣薄
寒有日似斜曛江南大有悲秋客臨水登山正
憶君

其十

颯颯涼風動旅途黃塵赤汗不曾蘇春明門外
人來往秋水篇中意有無失勢蚊蠅戀殘暑下

韓鷹隼快平蕪
蓼紅蘋白秋光好
獨倚軒車入畫圖

臨城驛壁見方侍御孩未題詩

驛吏逢迎舊赭衣
生還今日是耶非
綸竿喜值金雞放
華表真同白鶴歸
抱蔓摘瓜餘我在
破巢完卵似君稀
循牆歎息看題句
淅淅秋風起夕扉

十一月初六日 召對文華殿旋奉嚴

旨革職待罪感恩述事凡二十首

秘殿風高白日陰
天堦雲物晝沉沉
裂麻未是

廷臣意故卜空煩 聖主心 宸翰星回官燭
影禁庭雷殷屬車音孤臣却立彤墀內咫尺
君門淚滿襟

其二

綸扉晝閉詔麻停是日 天威赫震靈敢謂蟲
飛能蔽日亦知蟻鬪應占星 初三日木星入南
斗占曰大臣相殘
是日故
上疏浮名儘可供描畫腐骨終須付汗青寂
寞火城君莫笑案頭還有讀書螢

其三

久知不去又將鉗無奈時情似蜜甜薄命東華

縻月俸虛名南斗動星占出山我自慙安石作
相人終忌子瞻伏闕引刀男子事懶將書尺效
江淹

其四

碁局方闌睡正濃白身仍作舊吳儂狂奴本自
輕侯霸殘客何煩對敬容京雒緇塵看素髮御
溝流水見孤踪頻年放逐緣何事縱欲干時興
已慵

其五

事到抽身悔已遲每於敗局算殘棋都門有客

送臨賀廷辨何人是魏其楊柳曲中游子老車
輪枕畔逐臣知寒燈冷炕淒涼夜不醉何因作
酒悲

其六

孤生半世飽艱辛敢恨虞翻骨相屯吾道非與
何至此臣今老矣不如人養成枳棘難爲橘刈
盡椒蘭不作薪每誦韓公晚香句整襟時一慰
沉淪

其七

宮鄰初散鼠狐羣殷殷成雷又聚蚊卷舌光芒

仍炫耀台階氣象尚氤氲傷心詔獄生春草回首觚稜隔暮雲
明主定無鉤黨禁文華休擬作同文
倪侍讀鴻寶云文華殿寧可作同文館耶

其八

責薄恩多兩髻殘休將青鏡對南冠風霾放我稱遷客木稼從他怕達官
是月再有木稼之異朝士空憐銜鼠穴山妻應笑上魚竿得歸茅屋非無事還爲清時賦考槃

其九

一自承明罷直廬寂寥誰問子雲居久無關上

籌邊訊遠絕雲中款塞書

謂督師袁東莞撫日夷王新城二公

午冰稜漸屋角門閑風葉卷堦除論文最喜廉頗客解道朝盈與夕虛

其十

破帽青衫又一回當筵舞袖任他猜平生自分爲人役流俗相尊作黨魁明日孔融應便去當年王式悔輕來宵來吉夢還知否萬樹西山早放梅

其十一

兩月春明席未溫眼看深谷又高原金多爭羨

雒陽路禍至方思上蔡門五鼎食烹皆主父三
期賢佞總王尊莊生能悟逍遙理只爲精思曳
尾言

感長山劉
相而作

其十二

白日雷霆夾御筵捫心終不愧皇天變龍揖讓
誠難事賈豎爭言豈必然一道玉階清似水兩
條銀燭直於椽夕陽宮樹孤臣影只似他時候
八埒

其十三

未辯躬耕卽採薇刺天何事羣飛巢繇也是

中朝客變契依然大布衣故國秋風生邸舍閑
門冬日炤柴扉深慙薄劣干南斗莫更求名擬
少微

其十四

天語頻煩戒翰登可知不爲點青蠅 聖朝重
倚絲綸簿薄命難充粥飯僧春水花源尋伴侶
秋風瓜圃會賓朋書空泣涕非吾事縱是憂時
也不應

其十五

大門迭蕩夢中開鹵簿繽紛大祀回
警蹕聲誰

傳委巷燔柴光可炤寒灰身先席稿慙非禮

郊禮

席用稿積故云心願爲犧歎不才無分甘泉陪法從俳

倡私擬祝高禴

其十六

南郊燿火炤累恩正是秋衾夢斷時禁漏威遲

殘客舍朝衣顛倒覆家兒齋宮肝蠶詞臣賦宣

室深譚逐客知才薄可憐仍貶謫爐灰畫盡不

成詩

王元之南郊大禮詩云可憐此夜商於客畫盡爐灰淚滴衣

其十七

白日蕭閒午睡成睡餘兀坐又閒行烏喧老樹

聲還樂雀啍空枝墜不驚晚歲冰霜知物態虛
意研席見平生高車厚祿雖無分一領狐裘似
晏嬰

其十八

獵獵寒風歲逼除柴門剝啄到雙魚親憎言祿
催偕隱友賤求名勸著書薄俗休官如物故畏
塗削籍當遷除夕陽亭下城西路歎息何人返
敝廬

其十九

召對紛紛集邇英御前唯諾盡公卿夕垣又

駕柴車去

謂西江章給事也

朝省誰容仗馬鳴鸚鵡能

言殊反覆沙蟲善化更縱橫閒窻莫著歸田錄

數

上

日春林聽早鶯

其二十

闌珊朱墨對寒缸謫宦頻年氣未降可是負書
來上國還如讀易向東窻酒兵勝後消愁壘禪
鎧堅時折慢幢頗爲艱危識天意要令漁釣穩
三江

臘月十六日房海客侍御初度賦長句十
四韻爲壽君與章魯齋瞿稼軒兩給事皆

以枚卜事牽連謫官

同病同心不共談天涯只在禁城南
鈞天夢斷魂猶悸畫地羅成議不堪
去國味如初下第掛冠情比舊遺簪
希文敢擬賢稱四展季何妨黜
有三排格引繩良已甚排格卽排根也見漢書註
拔茅連茹亦奚慙尾狐善幻人爭訝
首鼠相蒙世所諳車馬駟闐懷舊雨
沙堤寂寞笑新叅羈栖仍是巢枝鳥
雌伏真成抱繭蠶御柳煙光遲積霰
香山雲物隔重嵐年華荏苒俱雙鬢
燈火青熒共一龕事過皺眉休再問
歡逢開口莫辭耽孺人憂

瑟齊稱壽侍女投壺半倚酣
燕酒沽來多似蜜
蜀椒搗後可如柑
題詩想見開筵處
定復掀髯
笑我憨

張藐姑太僕許餉名酒疊前韻奉簡

流落京華阻笑談
何殊太史滯周南
開籠縱鳥
知何日繞樹棲鳥
自不堪官罷故人稀
折簡罪
深
明主勅投簪
養狙自昔誰非四成虎
如今
不待三與我周旋
良已久受他描畫
有何慙機
心抱甕虛施巧毒手爭麻實飽
諳歇後賦詩誰
鄭五目前謀醉且曹叅郎當自笑
拖腸鼠角逐

閒看食葉蠶舊步生辰值箕斗新添銅疾在煙
嵐歸與卻掃求羊徑老去應同彌勒龕漏屋書
傳君自聖張以草書自負囚山賦就我真耽馬曹官好
看西爽酒郡封移帶宿酣張會謹成其肅故世有移封酒泉之戲世
路風波餘白首帝城節物到黃柑朋尊許餉
休相負一醉陶然共作慙

三疊韻謝藐姑太僕送酒

羈懷廓落向誰談尺五空瞻韋杜南官罷門閑
猶自可酒乾壺盡更難堪知君自愛新封郡念
我誰憐舊盃簪顧影陶潛惟有一揮盃李白不

成三尊盈何意勞相送瓶罄從茲遂不慙杜宇
謀歸身未得提壺勸飲耳先請料平量未敢傾
三雅斟酌應須醉二叅洗盞光先浮綠蟻當歌
興已動春蠶枯腸發發澆成浪醉眼騰騰看作
嵐草聖張顛真我友逃禪蘇晉與同龕典刑宛
矣柔而旨琴瑟依然樂且耽蕩滌三年忘昔夢
懣騰十指出餘酣解醒賴有春前茗下物還餘
霜後棋傳語時人應大笑不知誰點又誰慙

戊辰除夕

命酒呼盧強合歡春明門外禁鍾闌閤庭冷稱

將歸客卒歲除如已罷官爆火聲中思老母寒
燈影裏見南冠歲時舊事都無幾只有痴獸賣
不殘

牧齋初學集卷第六